

SÉRTÆK STARFSSKILYRÐI

fyrir starfsemi þar sem fram fer húðflúrun, húðgötun, húðrof og fegrunarflúr

samanber lög nr. 7/1998 um hollustuhætti og mengunarvarnir, reglugerð nr. 903/2024 um hollustuhætti og 5. gr. reglugerðar nr. 830/2022 um skráningarskyldan atvinnurekstur samkvæmt lögum um hollustuhætti og mengunarvarnir

1 Gildissvið

Starfsskilyrði þessi gilda fyrir húðflúrstofur og stofur þar sem fram fer húðgötun, húðrof og fegrunarflúr, þar með talið stofur þar sem boðið er upp á nálastungur. Jafnframt gilda almenn starfsskilyrði fyrir skráningarskylda hollustuháttastarfsemi fyrir ofangreinda starfsemi.

Komi fram ósamræmi milli starfsskilyrða þessara og þeirra laga og reglugerða sem um starfsemina gilda á hverjum tíma, þá ganga lög og reglugerðir framur starfsskilyrðum.

2 Aðstaða

Í vinnurými skal vera sérstök handlaug með fljótandi handsápu, gerileyði og einnota handþurrkum eða sambærilegu. Eftirlitsaðili getur gert ítarlegri kröfur vegna smitgátar, svo sem um handfrjálsan búnað.¹

Nauðsynleg aðstaða og búnaður skal vera til staðar til þvotta og sótthreinsunar á áhöldum, svo sem borð, skolvaskur, áhaldapvottavél og gufusæfir, sem og nægjanlegt rými til að aðskilja hreint frá óhreinu og til geymslu á hreinum og dauðhreinsuðum áhöldum.²

Gestir skulu hafa aðgang að fullbúinni snyrtingu. Baðaðstaða skal vera til staðar fyrir viðskiptavinum þar sem við á. Eftirlitsaðili getur gert ítarlegri kröfur vegna smitgátar, svo sem um aðstöðu til að skipta um föt.³

¹ Rg. 903/2024, 32. gr.

² Rg. 903/2024, 32. gr.

³ Rg. 903/2024, 32. gr.

3 Sérstakt hreinlæti

Ítrasta hreinlætis skal gætt í samræmi við þá starfsemi sem um ræðir og húsnæði og búnaði haldið hreinu og snyrtilegu. Allsherjarhreingerning skal fara fram eftir þörfum en að minnsta kosti árlega.⁴

Starfsfólk skal gæta ítrasta hreinlætis við störf sín. Ávallt skal þvo hendur fyrir og eftir snertingu við viðskiptavin, meðferðir eða aðgerðir og hvers konar inngrip. Einnota hanskar skulu notaðir þar sem við á.⁵

Þvott, þar sem meðferðir og inngrip eru og hætta er á húðrofi eða að húð sé rofin, skal þvo við 60°C – 90°C. Handklæði, ábreiður eða tauhlífar skal þvo eftir hvern viðskiptavin og geyma í skápum eða ílátum.⁶

4 Smitgát og sóttvarnir

Þar sem gerðar eru stungur á húð skal viðhafa sérstaka smitgát.⁷

Sá sem framkvæmir aðgerð skal þvo hendur sínar fyrir og eftir aðgerð. Hreinir einnota hanskar skulu notaðir við húðflúrun og húðgötun á meðan á verkinu stendur.⁸

Nota skal hreinan búnað og sótthreinsuð eða dauðhreinsuð áhöld fyrir hvern viðskiptavin. Nota skal einnota nálar og hnífa. Æskilegt er að önnur áhöld og búnaður sé einnota þar sem því verður við komið.⁹

Sé notaður margnota búnaður og áhöld skulu þau þvegin vandlega og eftir atvikum sótthreinsuð eða dauðhreinsuð. Dauðhreinsuð áhöld skulu pökkuð eða varin á viðurkenndan hátt og geymd fram að notkun í lokuðum umbúðum eða ílátum þar sem þau verða ekki fyrir utanaðkomandi óhreinindum eða hnjaski.¹⁰

Tæki og áhöld skal þvo vandlega og sótthreinsa eða dauðhreinsa svo fljótt sem auðið er eftir notkun og ávallt á milli notkunar og á milli einstaklinga. Hreinsun skal framkvæmd með viðeigandi efnum og aðferðum og tækjabúnaði sem er yfirfarinn og gæðaprófaður reglulega með viðurkenndum aðferðum.¹¹

⁴ Rg. 903/2024, 32. gr.

⁵ Rg. 903/2024, 32. gr.

⁶ Rg. 903/2024, 32. gr.

⁷ Rg. 903/2024, 32. gr.

⁸ Rg. 903/2024, 34. gr.

⁹ Rg. 903/2024, 32. gr., 34. gr.

¹⁰ Rg. 903/2024, 32. gr., 34. gr.

¹¹ Rg. 903/2024, 32. gr.

Fylgja skal notkunarleiðbeiningum á umbúðum sóttthreinsivara til að tryggja fulla og rétta virkni þeirra og að ekki hljóti af þeim skaði. Vörur skulu uppfylla kröfur reglugerðar um sæfivörur.¹²

Dauðhreinsibúnað skal prófa með sporaprófum eða öðrum viðurkenndum aðferðum. Prófun skal fara fram eftir þörfum, þó eigi sjaldnar en fjórum sinnum á ári. Niðurstöður prófa skulu verða aðgengilegar eftirlitsaðila.¹³

5 Sóttmengaður úrgangur

Rekstraraðili skal tryggja að allur sérstakur úrgangur sem fellur til á stofum sem stunda húðrof sé meðhöndlaður á viðunandi hátt í samræmi við I. viðauka rg. nr. 803/2023 um meðhöndlun úrgangs og þess gætt að hann blandist hvorki við heimilisúrgang né annan úrgang.¹⁴

Flokka skal úrgang frá stofum sem stunda húðrof á upprunastað. Sérstökum úrgangi skal tafarlaust pakkað í viðeigandi umbúðir eftir að hann hefur myndast, hann merktur og komið í geymslu í loftræstu og lokuðu rými þar til hann er fluttur til förgunnar. Sá sem sér um flutning á sérstökum úrgangi frá stofum sem stunda húðrof skal hafa starfsleyfi. Halda skal kvittunum um móttöku, hvort sem er á pappír eða tölvutæku formi, til haga fyrir eftirlitsaðila.¹⁵

Rekstraraðili skal tryggja að starfsfólk sem meðhöndlar sérstakan úrgang frá stofum sem stunda húðrof fái fræðslu um meðhöndlun hans og upplýsingar um þá ábyrgð sem það ber varðandi slíkan úrgang. Skrá skal þjálfun og fræðslu starfsfólks.¹⁶

6 Leiðbeiningaskylda

Óheimilt er að flúra, gata húð eða beita nálastungum á einstakling undir 18 ára aldri, nema með skriflegu samþykki forráðamanns. Framvísa skal skilríkjum ef vafi leikur á um aldur.¹⁷

Óheimilt er að flúra, gata húð eða beita nálastungum á fólk sem er undir áhrifum áfengis eða annarra vímuefna.¹⁸

Viðskiptavinir skulu fá munnlegar og skriflegar upplýsingar um aðgerðina, þ.e. húðflúrun eða fjarlægingu þess, húðgötun eða annað húðrof. Upplýsingarnar skulu m.a. fela í sér fræðslu um varanlega breytingu á húð, sýkingarhættu, eftirmeðferð á flúraða eða gataða húðsvæðinu og hugsanleg ofnæmisviðbrögð, eftir því sem við á.¹⁹

¹² Rg. 878/2014

¹³ Rg. 903/2024, 32. gr.

¹⁴ Rg. 903/2024, 32. gr. og rg. 803/2023, 12. gr., I. viðauki

¹⁵ Rg. 803/2023, 12. gr., I. viðauki

¹⁶ Rg. 803/2023, 12. gr.

¹⁷ Rg. 903/2024, 34. gr.

¹⁸ Rg. 903/2024, 34. gr.

¹⁹ Rg. 903/2024, 34. gr.

Rekstraraðilar skulu hengja upp á áberandi stað þær reglur sem gilda um starfsemina.²⁰

7 Húðflúrlitir og skartgripir

Skartgripir sem settir eru í nýgerð göt á húð skulu vera dauðhreinsaðir og lausir við skaðleg efni.²¹ Þeir skulu uppfylla kröfur efnalaga en auk almennra ákvæða gilda tilteknar sértækar kröfur varðandi málma í skarti.²²

Einungis er heimilt nota blek til húðflúrunar og varanlegrar förðunar sem uppfyllir sértækar takmarkanir varðandi efnainnihald, merkingar og notkun.²³

8 Hæfni

Sá sem stundar húðgötun, húðflúrun eða veitir meðferð með nálastungum, skal áður en viðkomandi hefur störf og svo á fimm ára fresti, standast hæfnispróf á viðurkenndu námskeiði í beitingu smitgátar, hreinsun, sótthreinsun og dauðhreinsun og öðru sem viðvíkur starfseminni eða hafa lokið námi á heilbrigðissviði, sem felur í sér fræðslu um smitgát og sóttvarnir.²⁴

Rekstraraaðili skal framvísa gögnum þess efnis að starfsfólk uppfylli ofangreint.²⁵

²⁰ Rg. 903/2024, 34. gr.

²¹ Rg. 903/2024, 32. gr.

²² Rg. 888/2015 (REACH)

²³ Rg. 888/2015 (REACH)

²⁴ Rg. 903/2024, 34. gr.

²⁵ Rg. 903/2024, 34. gr.